

[201r:] **An den christlichen vnd gütthertigen Leser.**

Aus was christlichen vnd wollmeynenden vrsachen dieses catechismus buchlein erstlich in latinischer sprach aus den schriefften des herrn Philippj Melanthonis zusammengezogen vndt fur die knaben in der particular-
 5 schuelen vf biette vndt anhalten vieler gelertten vndt gottseligen schuelmeister in druck vorordnet, damit es denen, so des herrn Lutherj catechismum gelernet, ferner gleychsam eine vorbereytung sein möchte zu den hohern schriefften vnserer lieben veter vndt praeceptorum, darinnen alle stuck vnserer christlichen religion weytleufftiger gehandelt vndt ausgefuhrt worden sindt,
 10 solchs ist nach der lenge vndt getrewlich angezeigt in nachfolgender praefation, so fur dem latinischen catechismo auch zuuor furher gesetzt worden.

Doraus gnugsam zu ersehen, das wier den deutzschen catechismum des ehrwürdigen herren doctoris Lutherj als ein edles vndt tewres kleinod in dieser lande kirchen vndt schulen hoch vndt werdt halten vndt vnser kinder von
 15 jugendt auf dartzu mit vleiß vndt ernst gewehnen, vndt das wier nicht aus ehrgeitz, nicht vnser nutzes halben, nicht vmb zancksucht wiellen, nicht aus eynigem furwitz, sondern allein der jugendt in latinischen schulen, welche [201v:] allgemehlich in studiren weyter gebracht werden sollen, zum besten diese epitomen oder auszugk in form eines latinischen catechismj gestellet,
 20 darinnen wier auch nichts newes, nichts frembdes, sondern eben die lehre, die in den bewerthen vndt bekandten buchern vnserer praeceptorum zu befinden vndt in diesen landen bey allen gottsvorstendigen vndt der warheynt vndt friedt liebenden leutten stetts fur recht gehalten, mit trewem vleiß wiederhollet, auch denen allen, so es besser nicht fassen köndten vndt mit der schulen
 25 zu Wittenbergk vndt dieser lande kirchen christliche eynigkeit suchten vndt begerten, sich solches buchlins zu gebrauchen frey heimgestellet vndt niemandes vngebürlicher weyse aufgedrungen worden sey.

Nachdem aber bißher wieder solchen latinischen catechismum so viel vndt mancherley vorleumbdung vndt lesterschriefft vnder den gemeinen mahn,
 30 welcher der latinischen sprach vnberichtet, von denen, so vnder sich der lehre halben selbs nicht eins sindt, ausgesprenget vndt noch kein auffhorens sein will, vnangesehen aller richtigen vndt warhafften vorantwortung, wirdt hiemit auch im nahmen Gottes gemelter latinischer catechismus in deutzscher sprach dem christlichen vndt gutt-[202r:]hertzigen leser furgestellet, nicht das yemandt weiter vrsach zu feindtseligen zanck vndt hader
 35 gegeben werde – wie dan derhalben der nahmen, so diesen catechismum angefochten, meldung alhie ausgelassen –, sondern das diejenigen, so bißhero durch die falschen lesterungen vndt giefftigen vorleumbdungen irre gemacht vndt geergert worden, selbst mit eygenen augen sehen vndt im
 40 grundt der warheit vorstehen mugen, was doch fur eine lehre in dem buchlin des latinischen catechismj gefasset vndt mit was warheit, gewiessen vndt vorsatz dieses buchleins halben die schuel zu Wittenbergk so gar feindtselig ein zeytlang her geschmehet vndt vorlestert sey.